



Datë: 14.04.2026

A.nr. 169/2026

Këshilli i Pavarur Mbikëqyrës për Shërbimin Civil të Kosovës—Kolegji për Shqyrtimin dhe Vendosjen e Ankesave, në përbërje nga: Arben Mehmeti-kryetar, Ardita Haxhnikaj Demi dhe Malsore Gashi Bajraktari, anëtare, me Avdyl Bekteshi, në cilësinë e procesmbajtësit, në procedurën sipas ankesës me numër A.nr.169/2026, të datës 13.02.2026, të parashtruar nga ankuesi Xh.Ll, nga Podujeva, kundër organit të punësimit/Komisionit Qendror të Zgjedhjeve, në çështjen juridike “*kompensim material*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 14.04.2026, mori këtë:

V E N D I M

I. Detyrohet Ushtruesi i Detyrës së Drejtorit të Sekretariatit të Komisionit Qendror të Zgjedhjeve, që të bëjë shqyrtimin e kërkesës Nr.04/1-3969-2025 të datës 18.12.2025 të parashtruar nga ankuesi Xh.Ll, dhe të nxjerrë nxjerr akt administrativ në pajtim me legjislacionin në fuqi, brenda afatit prej pesëmbëdhjetë (15) ditësh nga dita e pranimi të këtij vendimi.

II. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil, Xh.Ll (në tekstin e mëtejme referuar: Ankuesi), me datë 13.02.2026, ka parashtruar ankesë në Këshillin e Pavarur Mbikëqyrës për Shërbimin Civil të Kosovës e cila është pranuar nën shenjë A.nr.169/2026 dhe numër protokolli:797/2026, kundër heshtjes administrative të organit të punësimit/ Komisionit Qendror të Zgjedhjeve, në kërkesën e tij të datës 18.12.2025.

Këshilli i Pavarur Mbikëqyrës për Shërbimin Civil të Kosovës (*tutje referuar Kolegji i Këshillit*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 16.02.2026 ka proceduar kërkesën për përgjigje në ankesë te Komisioni Qendror i Zgjedhjeve, ndërsa kjo e fundit më datë 12.03.2026 ka dërguar përgjigjen në ankesë se bashku me shkresat e bashkangjitura të lëndës.

Kryetari i Këshillit, me datë 11.03.2026 ka nxjerrë Vendimin me shifër VK/2025 dhe numër protokolli:1270/2026, përmes të cilit ankesës së ankuesit nën shenjë A.nr.169/2026 të datës 13.02.2026 ia ka vazhduara afatin e vendimmarrjes edhe për dhjetë (10) ditë të tjera, ditë pune.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit)ndërlidhur me vendimmarrjen administroi këto prova: Ankesa me numër protokolli 797/2026 të datës 13.02.2026, e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Kërkesën e datës 18.12.2025; Kërkesën për përgjigje në ankesë e datës 16.02.2026; Përgjigje në kërkesë e datës 12.03.2026; Kontratë e punës e datës 08.08.2025; Aneks kontratë e datës 01.12.2025.

Kolegji i Këshillit, pasi që ka shqyrtuar të gjitha shkresat e lëndës, ka konstatuar se meqenëse nuk është nxjerr akt administrativ lidhur me kërkesën e ankuesit, atëherë ekziston baza ligjore që të detyrohet Ushtuesi i Detyrës së Drejtorit të Sekretariatit të KQZ-së, të nxjerr akt administrativ në pajtim me legjislacionin në fuqi lidhur me shqyrtimin e kërkesës të datës 18.12.2025 të parashtruar nga ankuesi, **sepse:**

Nga administrimi i shkresave të lëndës të ofruara nga palët në procedurë, Kolegji i Këshillit konstatoi se ankuesi sipas Kontratës së datës 08.08.2025 ka të themeluar marrëdhënien e punës së përkohshme në shërbimin civil në kuadër të Komisionit Qendror të Zgjedhjeve në pozitën e punës “Zyrtar për Koordinimin në Teren” në kohëzgjatje prej datës 08.08.2025 e deri me datë 31.11.2025, me mundësi të vazhdimit, kurse përmes Aneks Kontratës së datës 01.12.2025 ankuesit i vazhduar marrëdhënia e punës deri me datë 31.01.2026.

Ankuesi, me datë 18.12.2026 i është drejtuar Ushtuesit të Detyrës së Drejtorit të Sekretariatit të KQZ-së me kërkesën Nr.04/1-3969-2025 për kompensim material të përvojës së punës, me arsyetimin se në pagën përkatëse nuk i është përfshirë edhe kjo shtesë.

Kundër heshtjes administrative të organit të punësimit, ankuesi me datë 14.04.2026 ka parashtruar ankesë në Këshill me pretendimin ankimor se i njëjti është duke u dëmtuar financiarisht, pasi që në pagën e marrë nuk i është paguar edhe shtesa e përvojës së punës sikurse parashihet me ligjin e pagave në sektorin publik, me kërkesën që Këshilli të aprovoi kërkesën e tij në përputhje me legjislacionin në fuqi.

Këshilli në kërkesën për përgjigje në ankesë të datës 26.05.2025 ndër tjerash kishte kërkuar prova dhe sqarime nga organi i punësimit, ndërsa të njëjtit me rastin kthimit të përgjigjes në ankesë përmes shkresë së datës 12.03.2026 kanë kërkuar që ankesa e ankuesit të refuzohet ndërsa nuk kanë ofruar dëshmi se kërkesa e ankuesit është shqyrtuar.

Lidhur me vendosjen e kësaj çështje juridike-administrative, meqenëse pala ankuese, me datë 18.12.2025 ka parashtruar kërkesë te organi i punësimit, atëherë Kolegji i Këshillit lidhur me obligimin e organit publik që të shqyrtoj kërkesën e palës dhe të nxjerr akt administrativ, iu referua Ligjit Nr.05/L-031 për Procedurën e Përgjithshme Administrative respektivisht nenit 11 paragrafi 3 nën paragrafi 3.2, i cili përcakton se: *“3. Organi u siguron personave të interesuar dhe palëve informacion të saktë, të qartë dhe të kuptueshëm rreth: 3.2. kërkesave thelbësore ligjore si dhe procedurave e formaliteteve të parashikuara për nxjerrjen e një akti administrativ apo realizimin e një akti real të kërkuar, përfshirë këtu edhe dokumentet dhe deklaratat që duhen parashtruar”*, nenit 27 paragrafi 1, i cili përcakton se: *“1. Përveçse kur parashikohet ndryshe me ligj, zyrtari përgjegjës zhvillon procedurën administrative, vendos për çështjen, e nënshkruan vendimin si dhe siguron njoftimin e palës”*, nenit 97 paragrafi 1, i cili përcakton se: *“1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative”*, në këtë rast, në kuptim të nenit 98 paragrafi 1 dhe 2 të Ligjit Nr. 05/L-031 për Procedurën e Përgjithshme Administrative, ku përcaktohet se: *“1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj”*, dhe për rrjedhojë konstatoi, se organi të cilit i është drejtuar kërkesa, në rrethanat e rastit konkret Ushtruesi i Detyrës së Drejtorit të Sekretariatit të KQZ-së është dashur të vendos brenda afatit prej 45 ditësh, apo të aplikohet neni 99 i Ligjit Nr.05/L-031 për Procedurën e Përgjithshme Administrative, mirëpo meqë kërkesa e palës ankuese nuk është shqyrtuar, atëherë është aplikuar heshtja administrative.

Sipas dispozitave ligjore në fuqi në rast se organi publik hesht ndaj kërkesës së palës, atëherë palës i lind e drejta që të parashtrorj ankesë tek organi i shkallës më të lartë kundër heshtjes administrative duke u bazuar në dispozitat e nenit 127 paragrafi 4 të Ligjit Nr. 05/L-031 për Procedurën e Përgjithshme Administrative, ku përcaktohet se: *“4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ”*, si rrjedhojë, Kolegji i Këshillit, konstaton se meqenëse organi i punësimit ka heshtur ndaj kërkesës së ankuesit, ankesa e ankuses e datës 13.02.2026 e parashtruar në Këshillin e Pavarur Mbikëqyrës për Shërbimin Civil të Kosovës është e pranueshme në kuptim të nenit 127 paragrafi 4 të Ligjit Nr. 05/L-031 për Procedurën e Përgjithshme Administrative.

Kolegji i Këshillit, duke u bazuar në kuadrin ligjor të cekur si më lartë, lidhur me obligimin e organit përkatës për të vendosur lidhur me kërkesën e palës, e obligon Ushtruesin e Detyrës së Drejtorit të Sekretariatit të KQZ-së, që të nxjerr akt administrativ në pajtim me legjislacionin në fuqi lidhur me shqyrtimin e kërkesës Nr.04/1-3969-2025 të datës 18.12.2025 të parashtruar nga ankuesi, në atë mënyrë që gjatë shqyrtimit të kërkesës të shqyrtohen të gjitha pretendimet e palës ankuese dhe të vendoset për të gjitha pretendimet në fjalë në kuptim të nenit 48 paragrafi 1 ndërlidhur me nenin 134 paragrafi 1 të Ligjit Nr. 05/L-031 Për Procedurën e Përgjithshme Administrative.

Andaj, pas analizimit dhe vlerësimit të të gjitha shkresave të lëndës si dhe duke u bazuar nën 6 paragrafi 1, nën paragrafi 1.1 dhe nën 18 paragrafi 1 nën paragrafi 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, Kolegji vendosi si në dispozitiv të këtij Vendimi.

Ky vendimi hyn në fuqi ditën e nënshkrimit nga Kryetari i Kolegjit.

Këshillë juridike: Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda, A.nr.169/2026, datë 14/04/2026

Avdyl BEKTESHI

Procesmbajtës

Arben MEHMETI

Kryetar i Kolegjit

Vendimi i dorëzohet:

- Ankuesit Xh.Ll;
- Komisionit Qendror të Zgjedhjeve (*Ushtruesit të Detyrës së Drejtorit të Sekretariatit*), si dhe
- Arkivit të KPMSHCK-së.